


4
GIGANTOMACHIE
POVR RESPONDRE
A LA
GIGANTOSTOLOGIE.



1613.







L A
G I G A N T O M A C H I E
O P P O S E E A L A G I -
g a n t o s t o l o g i e ,

Par vn Escholier en Medecine.

O V s ceux qui se meslent d'escrire,
T protestent au commencement de
leur liure, qu'ils sont poussez d'un
zele de seruir au public, & d'esclair-
cir la verité des choses qui sont inco-
gneues & douteuses. C'est le desir & l'intention
que doit auoir vn bon Medecin, ce dict Galien,
d'estre curieux à rechercher la verité, l'ayât trou-
uée la publier & manifester à tout le monde. Lib. 1. de
nat. facul.
cap. 10.
Mais pour atteindre à ceste perfection, il faut e-
stre bien fondé & instruit aux bonnes lettres &
sciences, puis trauailler iour & nuict à lire les li-
ures des anciens Medecins, & lors qu'on sera fort
aduancé en la Medecine, on pourra iuger & dis-
cerner le vray d'auec le faux, pour reietter l'un &
embrasser l'autre.

M. Nicolas Habicot Chirurgien, en l'epistre
adressee au Roy, nous represente la verité ca-
chée, non dans le puits de Democrite, comme
disoient les anciens, mais entre les deux contrai-

res de ouy & de non : laquelle ila trouuee en la Gigantostologie, puis qu'il est si asseuré en son escrit, qu'il a osé presenter au Roy, il semblera à plusieurs qu'il contient verité. Mais il me permettra, s'il ayme la verité, de luy remonstrer les erreurs & faussetez qui sont dans son escrit, rempli autant de mensonges que d'ignorance, qui contient autant d'inepties que de mots, car outre le langage qui est mauuais François, l'orthographe y est du tout ridicule; le discours en l'Anatomie est tout à fait faux : qui telmoigne vne grande ignorance de l'Anatomie. Galien nous

Comment.
ad parr' lib.
i. de fract.

aduertit que ce qui est ridicul & inepte doit estre plustost mesprisé que refuté par escrit: neantmoins il permet qu'on remontre les fautes à telles personnes, principalement quand ils pensent sçauoir quelque chose par dessus les autres.

Je n'eusse jamais entrepris d'attaquer le sieur Habicot, n'estoit qu'il a eu la reputation d'estre vn sçauant Chirurgien, & bon Anatomiste, auant qu'il eust fait paroistre par escrit son ignorance. Mais à ce coup ie feray cognoistre qu'il est peu entendu & versé en l'Anatomie, quoy qu'il se qualifie Chirurgien iuré en l'Vniuersité de Paris: tiltre nouueau qu'il adiouste à ses qualitez, que ceste celebre Vniuersité de Paris, qui n'a iamais produit ny recogneu pour siens telles personnes, luy retranchera : encores que son liure soit recommandé par les Epigrammes de quelques Regens de l'Vniuersité, fort sçauans, lesquels eussent mieux fait de ne point soubcrire leurs noms, de peur qu'ils ne soient soupçonnez frequenter

la boutique d'un Chirurgien.

Vostre intention est de monstrier que les os qui ont esté apportez à Paris, sont les os d'un homme Geant de grandeur excessiue : ce que voulez prouuer par histoires anciennes, monstrant qu'il y a eu des Geants, & que les os qu'on voyoit à Paris ces derniers mois, estoient ceux d'un Geant nommé Teutobochus. Je vous aduertiray en passant, que la pluspart de vostre discours touchant les Geants, à sçauoir s'il y en a eu, d'où prouient leur origine & grandeur, de leur force & façon de viure, si les os exposez sont les os du Roy Teutobochus, est desrobé d'un petit liure que celuy qui monstroit les os distribuoit luy-mesme, composé (disoit-il) par un Pere Iesuite de Tournon. Ce discours est mieux tissu & basti que le vostre, vous l'avez gasté y adioustant les vers des Poëtes, que vous n'avez iamais veu par la couuerture, encotes moins leu, & n'en sçavez pas le nom: tesmoin le Poëte Colomachus. Pourquoy d'un vers Latin de Virgile en faictes vous deux, pour les mettre en rithme François? & en oster vne syllabe qui vous sembloit superflüe, car le liure du porteur d'os lit,

Grandiaque effosis mirabitur ossa sepulchris.

Et vous pour dire quelque chose de nouueau vous escriuez,

Grandia que fosis,

Mirabitur ossa sepulchris.

Et cottez à la marge que le vers est du douziesme de l'Eneide. Le liure du porteur d'os vous à trôpé, car il est pris du premier liure des Georgiques.

Vous escriuez aussi mal en Latin qu'en François, & feriez beaucoup pour vostre honneur, de ne plus contrefaire le Medecin, ny escrire vos receptes en Latin chez les Apoticaire; car les seruiteurs s'en mocquent, & ne sçauent ce qu'ils doiuent mettre, d'autant que la mauuaise orthographe faict souuent changer le sens des choses.

Ie ne m'arresteray point à reprendre les inepties que vous rapportez des Geants, ny moins m'estendray sur le discours des Geants, pour monstrier la contrarieté des auteurs sur ce subiect, ie renuoye le curieux de ceste matiere au chapitre quatriesme du liure premier des Meslanges, composé par Hieronius Magius sçauant Italien, & au liure de la Gigantomachie, faict par le docte Medecin de deux Imperatrices Ioannes Goropius Becanus où il refute l'erreur populaire des Geants. Ie vous cote expressement ces deux liures, afin que si vous vous armez pour soustenir ces Geants, vous n'alliez ramasser & emprunter toutes ces histoires fabuleuses.

Mais par dessus ceux-cy, i'adiousteray que Vitruue a desfiny la iuste grandeur de l'homme estre de six pieds Romains, ce qui se rapporte à ce que dict Ioannes Goropius, selon le iugement d'Homere, que la hauteur d'un homme beau & parfait est de quatre coudées, la largeur d'une coudée. Le coude Latin & Grec contient un pied & demy. Varron, au rapport d'Agellius, escrit que la plus grande hauteur d'un homme est de sept pieds. Ce que ledict Agellius assure estre plus veritable, que le recit du conteur Herodote; qui

dit au premier liure de ses histoires, le corps d'Orestes auoir esté trouué dans terre long de sept coudees, qui font douze pieds & vn quart. Macrobe ne pense pas qu'il y ait eu des Geants hommes de grandeur excessiue. Il faut croire, dit-il, que les Geants ont esté vne nation impie, atheiste, qui ne cognoissoit pas les Dieux, & pource on a creu qu'elle vouloit attaquer & chasser les Dieux de leur trosne. On donne à ces Geants des pieds comme les queuës entortillees de dragons, voulans par là signifier qu'ils auoient l'esprit ny droict ny releué, ains tousiours rampant contre terre. Si nous reuenons aux Philosophes, ils nous enseignerōs qu'il n'y a point d'apparence de croire qu'il y ait eu des homes de grandeur si enorme, qu'elle est descrite par les auteurs. Vous deuez scauoir que toutes choses, selon la forme ou selon la matiere, ont certains bornes, qu'ils ne peuent outrepasser, comme dict Aristote, mais il faut confesser que ceste borne ne consiste pas en vn certain poinct & degré, qu'elle a de l'estenduë plus ou moins: partant qu'il peut y auoir des hommes plus ou moins grands les vns que les autres, mais non pas d'vn double corps. Ce que nous tesmoigne Aristote: *perfectiendi cuiusque animalis certa est magnitudo, tum ad maius tum verò ad minus, quem terminum non excedunt, ut vel maiora vel minora euadant. Sed in medio magnitudinis spatia excessum defectumque inter se capiunt, atque ita homo alius alio auctior est, & ceterorum quoduis animalium.*

Je dis dauantage que l'accroissement ne depend

pas de la matiere, ains de la forme, comme demontre Aristote contre Empedocles. Or la forme vegetante des senences est telle qu'elle estoit aux premiers siecles, partant s'il y auoit eu des Geants, il s'en verroit encores à present, car le ciel ne s'est point changé depuis ce temps là, il a les mesmes influences, & la terre produit les mesmes effects.

*Non alios prima crescentis origine mundi
Fluxisse dies, aliumve habuisse tenorem
Crediderim, ver illud erat, ver magnus agebat
Orbis, & hybernis parcebant flatibus Euri.*

Lucrece ayant recité en son premier liure les Geants que l'antiquité fabuleuse nous a descrits, il s'estonne pourquoy la nature au iourd'huy ne les produit plus,

*Denique cur homines tantos natura creare
Non potuit, pedibus per pontum qui vada possent
Transire, & magnos manibus diuellerè montes
Multaque viuendo vitalia vincere sacra.*

Magius apres auoir raconté plusieurs histoires des Geants, en fin confesse que les hommes du temps passé n'estoient pas plus grands que ceux d'auourd'huy, comme il se void dans les anciens monuments d'Italie, par les armes, casques & corselets des anciens.

Ie sçay que les Epicuriens maintiennent que le monde va tousiours vieillissant, la force des elements se consommant petit à petit, qui faict que tous les animaux amoindrissent. Mais ceste raison des Epicuriens est du tout frivole: car si le monde alloit tousiours vieillissant, il ne deuroit plus

plus engendrer, d'autant que la vieillesse se recognoist par la sterilité & priuation d'engendrer, non par la petitesse des animaux. Si cela estoit veritable aux animaux, pourquoy ne se remarqueroit-il point aux plantes?

Les Stoiciens sont d'un autre aduis, disans que le monde approchant de l'ecpyrose ou embrasement vniuersel, l'humeur radical des semences se desseiche qui faict que les corps des hommes & des autres animaux deuiennent plus petits, si cela estoit vray, nous deurions sentir les hyuers tous les ans deuenir plus tiedes, le monde s'approchant tousiours de l'ecpyrose; ce que nous ne ressentons point. Ioinct que le feu du ciel & des planetes n'est point destructeur, ains plustost conserveur & amplificateur des corps terrestres. Partant il y a peu d'apparence qu'il y ait eu des Geants, & que les hommes du temps passé ayent esté de beaucoup plus grands que ceux d'aujourd'huy.

Laissons maintenant le discours general des Geants, & reuenons au denombrement des os que vous auez faict, lequel plusieurs estimeroyent estre veritable, estant sorty de la boutique d'une personne, qui pense estre le plus sçauant Anatomiste de Paris. Car il dit que l'Anatomie l'a faict reluire par dessus beaucoup d'autres, Et qui plus est se vante par escrit, auoir monstré & enseigné publiquement il y a quinze ou seize ans l'Anatomie aux escoles de Medecine. Ioinct que ledict Habicot pour comble de son hōneur a composé vne pratique Anatomique, extraicte, comme il dict, de ses an-

ures non encores imprimees. (jaſtance inſupportable)
 avec vn Paradoxe myologique. Liures auſſi pleins
 d'ignorance & fauſſetez, cōme eſt celuy de ſa Gi-
 gātoſtologie. Ce que ie feray voir par la cōferēce
 des os qui ſont expoſez en ſa pratique Anatomic-
 que, avec ceux qu'il traicte en ce preſent liure.

Vous deſcriuez vne table de tous les os qui
 compoſent noſtre corps, & ſemble à voir ceſte
 pancharte qu'elle eſt fort methodique & verita-
 ble, mais elle contient autant de fauſſetez que de
 mots: vous monſtrez par là que vous eſtes ex-
 tremement ignorant en l'Anatomie, puis que
 vous ignorez l'Oſteologie: vous ne ſçauetz pas
 encores compter par vos doigts, ny par le iect,
 ny par la plume. Or Platon eſtimoit vn homme
 extremement ignorant, qui ne ſçauoit nombrer,
 il n'y a que l'homme ſeul qui le puiſſe faire, ce
 dict Ariſtote. Ceux qui ſont prompts à nombrer,
 ont l'eſprit fort eſueillé, capable de faire quelque
 choſe de bon.

Vous comptez & cottez 309. os, dont le corps
 humain eſt compoſé: vous en donnez 50. à la te-
 ſte, 70. au tronc, 120. aux extremittez, adiouſtez
 tout cela, vous n'en trouuez que 249. vous e-
 ſtes bien loin de voſtre compte: lequel nombre
 eſt imparfait, car il en faut 31. au bras, &
 n'en faut qu'un pour chaque hanche; vous ou-
 bliez les deux gros ſezamoides qui ſont au gros
 orteil, qui meritent autant eſtre nombrez entre
 les os, que les trois petits de l'oreille. Car vn ſche-
 let eſt deſectueux ſi vous ne les y adiouſtez & ar-
 rangēz en leur place, vous ne ſçauriez aſſigner

vn nombre iuste & certain des os, si vous ne distinguez le schelet d'un enfant, d'avec celui d'un homme parfait à quatorze ans. Tellement qu'il faut constituer deux Osteologies, l'une des enfans, l'autre des hommes parfaits.

Espluchons maintenant les os des trois parties du Schelet; vous en mettez huit à la teste, Galien n'en met que sept, reiettant l'os Ethmoïde pour certaines considerations, mais vostre nombre est pris sur les Modernes Anatomistes, & ie l'approuue. Hippocrate en constitue huit à la teste, mais il y comprend les os de la face; quelques-fois il s'en trouue neuf, quand la suture sagitale diuise l'os du front en deux. Vous scaurez, s'il vous plaist, puis que vous adioustez les trois os de chaque oreille, qui sont enfermiez dans l'os petreux, que certains Anatomistes, comme Bauhinus, attribuent au crane quatorze os. Mais d'autant que ces petits osselets sont contenus & enclos dans la cavitè de l'os petreux, ne composans aucunement le globe & la rondeur du crane, il ne les faut compter que pour parties de l'os petreux; lequel os petreux est partie de l'os temporal, & partant il faut dire deux os templiers, non pas deux os petreux. Car l'os des temples se diuise en partie squammeuse & petreuse.

Vous attribuez à la face vnze os, qui est le nombre de Fallope, que les derniers Anatomistes ont suiuy. En vostre Pratique Anatomique qui doit estre sans controuerse, vous escriuez ces mots pour faire cognoistre vostre opinion:
Quand aux os du visage, pour la grande controuerse qui

est entre les auteurs du nombre d'iceux, ie laisse la dispute & resolution au lieu d'où cecy est tire, mais attendant ie diray qu'ils sont 13. à sçauoir 2. du nez, 2. orbitaires, 2. maxillaires, 2. du palais, 2. sphenoides & le vomer. Voila vne grande contrarieté quant au nombre.

Mais la faute est plus lourde en l'enumeration & nomination. Qui est l'Anatomiste qui a faict deux Sphenoides, qui est celuy qui l'a rapporté à la maxille superieure. Je sçay que Galien l'a faict commun à la teste & à la maxille, mais il dit proprement appartenir à la teste. Il est diuisé en quatre parties aux petits enfans, & si pour cela il le falloit faire double, les autres os qui sont diuisez en quatre & cinq morceaux, seront autant d'os que de parties.

Vous oubliez les os iugaux en vostre Practique, que vous adioustez en vostre table.

Par les orbitaires ie ne sçay si vous entendez ceux, qui enfoncent dans l'orbite constituent le costé droict qui respond au grand coing de l'œil, qui est vne portcion de l'os ethmoide rapporté par Vesaleaux 12. os de la maxille qu'il faict, ou bien si vous entendez l'os vngulaire ou ongle, qui est touché proche le trou lachrymal; ainsi le deuiiez vous nommer, non pas orbitaire.

En vostre table vous oubliez les deux os du palais; & mettez deux iugaux, deux pommettes, qui ne sont que les mesmes os, & vn os septum; Je ne sçay si c'est celuy du nez, ou bien que vous entendiez le vomer, ainsi le deuiiez vous nommer, selon l'appellation commune.

Le nombre des dents est incertain, comme vous-mesme l'aduouëz en vostre Practique Anatomique, ioinct qu'ils sont fichez & enclauiez dans les maschoires: pour ces raisons plusieurs ne les content au desnombrement des os, bien qu'ils soient os en leur espece.

Vous mettez huit œillieres & quatre incisives, où auez vous appris cela? dictes s'il vous plaist huit incisives, & quatre canines, dont les deux de la maxille superieure sont dites œillieres, pour les raisons desduites par Charles Estienne, qui est en François, & que vous deuez auoir leu. Vous ne scauriez reparer ceste faute, car en vostre Practique vous dictes le mesme, qu'il y a tousiours en chaque maschoire quatre dents incisives & autant d'œillieres, qui est vne lourde faute.

Ostez s'il vous plaist de vostre esprit & escrit, que les dents sont composez de plusieurs pieces. Le Liure de *Dentibus*, composé par Bartholomeus Eustathius, le plus scauant Anatomiste qui ait esté, vous osterà ce doute, & enseignera plusieurs secrets pour ce qui est des dents que vous ignorez.

Vous donnez deux os au menton, dictes maxille inferieure, lesquelles ne se trouuent qu'aux enfans iusques à vn an, les deux os se reunissant tellement, qu'ils ne se peuuent plus aisement separer: partant il n'en faut faire qu'un, selon l'opinion des plus experts & doctes Anatomistes.

Vous placez à la gorge l'os hyoide, que vous voulez n'estre qu'un, encores qu'il se trouue aux

ieunes & aux vieillards diuisé en trois parties, bien souuent en cinq, rarement en sept morceaux reellement separez, toutesfois liez ensemble par Synchondroses. Je vous accorderay qu'il ne doit estre compté que pour vn, pourueu que vous consentiez que la maxille inferieure & l'os des hanches ne soient comptez chacun que pour vn seul os.

Vous bastissez l'eschine de trente vertebres, & en vn autre endroict vous dictes qu'elle est composee de vingt-quatre vertebres. Fernel seul a proposé le nombre de trente, mais les meilleurs Anatomistes n'admettent que vingt-quatre, & l'os Sacrum, qu'Hippocrate appelle la grande vertebre, (encores que ce mot soit approprié à d'autres vertebres dans Hippocrate) sera adiousté pour la vingt-cinquiésme vertebre. Et quand vous diriez & soustiendriez l'os sacrum se pouoir diuiser par longue ebullition en six morceaux, si est-ce qu'ordinairement il ne se trouue que cinq pieces desquelles il est composé.

C'est vne lourde faute d'y adiouster le cropion qui est cartilagineux, autrement il faudroit mettre entre les os le larinx, comme a fait Columbus, qui merite autant le nom d'os comme le coxis.

Lisant vostre Pratique Anatomique, ie trouue que vous en donnez six à l'os sacrum, contant trois pour le vray os sacrum, trois autres pour le coxis, qui est l'opinion de Galien, que les derniers Anatomistes ne reçoient pas, & que vous ne sçauriez prouuer ny deffendre pertinemēt.

Vous contez sept os au sternum, comme veut Galien, mais ny vous ny aucun Anatomiste ne me peut monstrier sept os au sternum d'un homme parfait, ny en celuy d'un enfant nouveau né: il ne s'en trouue que 4. ou 5. le plus souuent 3. fort rarement 6. quand le cartilage xyphoide est osseux, que l'on conte pour le 6. Ce dernier os vous a trompé, lors que vous commettez vne absurdité insupportable en vostre Pratique Anatomique, attribuant 8. os au sternum.

Vous assurez que les clavicules n'appartiennent qu'à l'homme seul, vous n'avez iamais veu le schelet d'un singe, où vous eussiez remarqué les clavicules, l'inspection dudict schelet estant extremement necessaire à un Anatomiste qui veut escrire parfaitement des os, pour cognoistre si Galien a dict vray, ou bien si les modernes Anatomistes le blasment à tort, comme ont fait Vesale, Columbus, & Fallope qui ne l'a pas espargné.

C'est vne grande faute à vous de vouloir diuiser l'os des hanches en trois parties, veu que Galien n'en fait qu'un distingué en trois parties, non qu'elles le soient reellement, sinon aux petits enfans iusques à un an, dautant que l'os estoit trop grand & ample pour le faire tout d'une piece; nature en le bastissant l'a fait de trois morceaux, qui par apres se reunissent tellemēt, qu'il n'y paroist aucune marque de diuision.

Vous ne contez que 30. os en tout le bras (ditez la main selon Galien) comprenant l'omoplate, ce nombre est faux, dautant que le poi-

gnet doit auoir huiſt os. Je ſçay que Veſale approuue voſtre nombre, & penſe que le petit os qui eſt poſé ſur le troiſieſme de la premiere rangée ioignant l'apophyſe ſtyloide du cubitus eſt ſezamoidien, comme les deux du gros orteil & la patelle : mais ſon opinion a eſté reiettee & condamnée par les derniers Anatomiſtes. Galien en conſtitue huiſt au poignet, lequel nombre vous aduouez en voſtre Pratique Anatomique.

Descendant aux iambes vous en nombrez 30. dittes au grand pied, car le pied comme la main ſe prend en deux façons dans Galien, pour ce qui eſt contenu depuis la hanche iuſques aux doigts, ou bien pour la troiſieſme & inferieure partie dudiſt pied. Si ie ſuppute bien ſelon mon calcul & ma plume, ie trouue que vous en nombrez trente & vn, d'autant que vous en mettez trois à la iambe. Mais ſi vous en oſtez vn, & y adiouſtez les deux os ſezamoidiens du gros orteil, vous trouuerez en chaque pied trente deux os. Car ces deux os ſezamoidiens meritent autant que la rotule, d'auoir lieu au nombre des os, leſquels Veſale n'a pas oublié en ſon compte, encores qu'il tienne la patelle pour vn os ſezamoidien, duquel il ne faiſt pas grand eſtat, pour le mouuement ferme de l'ambulation, comme vous verrez en ſa Chirurgie.

Vous corrigerez de voſtre Pratique Anatomique l'ethimologie de trochanter, qui vient du mot Grec *τροχας*, qui ne ſignifie pas trotter, mais tournoyer, & proprement en François
on

on a tourné trochanteres vireurs.

Pareillement effacerez de vostre Pratique Anatomique que le Perone en sa partie inferieure faict vn malleole, avec vne cauité glenoïde, pour loger le calcaneum; que la iambe outibia a en sa partie inferieure, a vne epiphyse caue pour receuoir le calcaneum, au lieu de calcaneū en ces deux endroicts vous mettrez, s'il vous plaist, l'Astragal.

Où auez vous appris que le Tarse se nomme Talon, comme vous dictes en vostre Gigantostologie, le Metatarsela plante du pied? Vous retiendrez que Talus proprement en Latin signifie l'Astragal, & abusiuement en François on l'attribue au calcaneum: auquel sens par apres vous le prenez, partant il ne peut signifier le tarse. La plante est le sousbassement du pied, le tarse est l'eminence du pied peu couuerte de chair.

Apprenez encores de Galien que les mouuemens obliques du pied ne se font point sur l'astragal, qui est entouré & enfermé par les deux malleoles, qui empeschent que le pied ne se remue lateralement ou obliquement: mais ce mouuement depend de l'articulation faicte par l'apophyse anterieure de l'astragale avec la cauité du scaphoïde.

Vous dictes que tous les os ont deux tables, apprenez qu'il n'y a que ceux qui sont solides & aplatis, & entre les moüelleux, s'il faut appeller moüelle le suc medullaire, qu'il n'y a que les os de la teste & les costes: les autres os n'ont que la superficie exterieure lisse & polie, celle du

dedans est aspre, rabotteuse & inégale.

Vous sçavez aussi qu'il n'y a point de membrane pour contenir & envelopper la vraie moëlle des os, comme vous dictes. Par là vous monstrez euidentement que vous n'avez iamais fait l'Ostecopie de tous les os du corps humain tant aux enfans qu'aux hommes parfaicts, pour cognoistre les differences des moëlles, qui sont les os qui ont moëlle, & ceux qui n'en ont point: curieuse recherche, qui est plus sçante & contenable aux Chirurgiens, pour sçauoir quels sont les os qui se peuvent reunir en vingt, trente, & quarante iours à raison de leur cavité & moëlle, que non pas disputer si la moëlle est la nourriture des os.

Vous choppez lourdement quand vous appelez la conionction artrodiale, ioincture enfoncée, veu qu'elle est superficielle: la ioincture enfoncée s'appelle enarthrose.

Or afin que vous soyez instruit & admonesté de toutes les fautes que vous avez commis en l'Osteologie, descrite brièvement en vostre Pratique Anatomique, selon le subiect que traitez, ce que ie ne blasme pas, (pleust à Dieu pour vostre honneur, & le profit des Chirurgiens, que c'eust esté véritablement.) Je vous aduerty que vous n'avez iamais veu la structure admirable de l'oreille descrite par Fallope, puis enrichie de belles obseruations par les Anatomistes modernes Bartholomeus Eustathius, Arantius, Volcherus Coiter, lesquels ont esté suivis par deux celebres Anatomistes de Padouë, Fabricius ab

Aqua euidente, & Iulius Casserius, qui ont écrit depuis sept ou huit ans chacun vn liure du bastiment de l'oreille. Vous eussiez appris par la lecture de ces bons liures, & eussiez peu de vous-mesme, y apportant de la peine & du trauail, descouurir ce qu'ils ont escrit de ce merueilleux edifice de l'oreille: c'est qu'elle est composee de quatre cauitéz ou cabinets: le premier en dehors iusques au Tympanum est le conduit de l'oreille qu'ils appellent Porus auditorius: Passant le Tympanum se trouue la seconde cauité nommée Concha, où sont logez & arrangez les trois osselets, Malleolus, Incus & Stapes. A l'extremité de ceste cauité opposee au Tympanum, se voyent deux Trous appelez Fenestres, dont la plus grande & Ouale est l'entree du Labyrinthe troisieme cauité, composée de six destours qui se rencontrent tous en vn petit creux, qui est au milieu comme vn carrefour. L'autre petit Trou du Concha est l'entree de la cauité appelle Cochlea, d'autant qu'elle est tortue comme la coquille d'une limace: icelle cauité aboutit dans le cérneau. Voila le plus gros du bastiment de l'oreille, que ie vous ay representé expressement, pour vous monstrier que vous n'entendez rien en la description de l'oreille interieure.

D'autant que vous dittes que le trou interieur de l'oreille n'a point de sortie, ce qui est faux.

Vous mettez des canaux nouveaux de l'oreille, contre l'opinion des auteurs qui en font d'autres. Le canal que vous dictes interieur, est

le mesme que vous auez appellé auparauant trou interieur : lequel canal s'il reçoit le nerf qui va faire le Tympanum , il aura sortie aussi bien que l'entree, ce que vous niez fermement, toutesfois vous confessez par apres la sortie sans y penser, disant *que la portion dure du nerf apres auoir esté dans le trou auditif, sort par le mesme trou que la veine & l'artere qui y sont entrez, pour se plonger dedans deux petits filaments musculaux.*

Vous n'admettez que trois cautez, & appelez la premiere Tympanum , comme a faict Vesale improprement, car ce mot conuient à la membrane tendue & bandee comme vn tambour.

Vous dictes qu'au trauers de la premiere cauité appelée tympanum sont placez les petits os le marteau, l'enclume & l'estrier, puis oubliant ce que vous auez escrit, vous dittes que le malleole est le premier os, l'enclume le second en rang, le troisieme le stapes, qui de sa base ferme la fenestre ouale : lesquels trois petits osselets faudra oster de la cochlee où ils sont contenus; peuuent-ils estre dans les deux cautez, dans la premiere dite tympanum, comme vous auez dict, puis dans le cochlea qui est la quatriesme cauité, où à vostre dire la troisieme apres le Labyrinthe?

Où auez vous appris que les os sont fibreux, pour attirer & retenir leur aliment, auez vous quelquesfois obserué les fibres & leur difference.

Qui vous a appris que les os sont durs par con-

denfation, comme vous dittes: vous retiendrez que condensation est vn mot des Methodiques, qu'on peut interpreter, selon Aristote, incrassation, bien que ce soient choses differentes, au iugement de Galien, & que les os sont durs par concretion, qui se faict par exsiccation.

Vous ne sçauriez monstrier qu'en la partie anterieure du calcaneum soient ioincts le nauculaire & le cubiforme, comme vous escriuez en vostre Gigantostologie, il n'y a que l'os cubiforme qui touche le calcaneum, le nauculaire est ioinct avec l'apophyse anterieure de l'astragale, & ces deux os que vous auez mal rangé, ne sont point articulez par synarthrose: mais l'un qui est le nauculaire, faict avec l'astragale vne diarthrose arthrodiale; l'autre os sçauoir le cubiforme est ioinct avec le calcaneum par Synarthrose harmoniale.

Je vous ay cotté les principales fautes que vous auez commis en l'Osteologie, ne m'estant arresté aux moindres, qui ne sont d'importance. Comme lors que vous dictes, le nombre des dents estre quelquesfois de vingt-quatre, ce qui n'est iamais: mais bien de vingt iusques à sept ans, & apres de vingt-huict ou trente-deux, ou trente-six, selon Galien, quand vous appelez les dents canines indifferemment œillieres, ce qui n'appartient qu'à celles de la maxille superieure, quand vous escriuez que l'omoplate a esté placé en son lieu, pour la grace du mouuement du bras, ce qui suit est plus absurde, & noïnement le col d'icelle omoplate. Ce que i'estime aussi ridi-

cul que l'eschâcrure, qui est entre le corone & le condile de la maxille superieure auoir esté faicte pour la liberté du Zigoma.]

Mais dautant que vous pourriez alleguer pour vostre deffence, que vous vous estes réglé sur l'Anatomic de Paré, qui est à tous vous autres vostre patron & cōducteur. Je vous aduertiray que Paré vous a trompé, qu'il n'est pas meilleur Anatomiste que vous, encores qu'il se vante comme vous, d'auoir souuent faict preuue tres-suffisante de son sçauoir en l'Anatomic aux Escholes de Medecine. C'est à tous vostre gloire de vous prifer, d'auoir montré & enseigné l'Anatomic aux Escholes de Medecine. C'est ce que vous desirez aujourd'huy avec tât d'affection & ambition pour nous brauer tousiours, & reprocher que nous ne sçauōs & ne tenons l'Anatomic que de vous autres. Or afin que tout le monde cognoisse que l'Anatomic a esté mal enseignée & administrée aux Escholes de Medecine par vous autres, depuis Paré iusques aujourd'huy: ie vous produiray sommairement les fautes de Paré en l'Osteologie qui vous ont abusé.

Premierement il compose le crane de huit os, comprenant l'os Criste, qui est vn nom nouveau, & mal adapté à l'os ethmoide, qu'il entéd, comme ie croy, dautant que par apres il le décrit pour le huitiesme os: duquel Ethmoide procede vn cartilage qui separe le nez en deux, c'est vn os, non pas vn cartilage.

L'os frontal est mal appellé coronal, Galien ny aucun bon Anatomiste l'a nommé ainsi: le

nom de la suture ne peut appartenir à cet os, plus tost qu'à ses voyfins.

L'os des Temples est improprement nommé os Petreux, sans faire mention de sa partie squammeuse.

Il est faux que les *Æthiopiens* ou *Mores*, & tous ceux qui habitent és lieux chauds vers le *Midy* & l'*equinoctial*, ont le crane fort dur, & n'ont point ou peu de suturés, ce que j'ay remarqué faux en l'*Anatomie* d'un *More*, duquel ie peux monstrier le crane. Je sçay qu'*Herodote* & *Aratus* ont les premiers rapporté cela des *Æthiopiens*, mais ils n'estoient pas *Medecins*, & *Paré* raconte tout cela comme de luy-mesme & de ses obseruations.

C'est chose superflue de parler des os orbitaires à part, comme s'ils estoient des os separez, veu que ce sont portions des os du crane, & de ceux de la maxille superieure. Il dict que les os de la face sont en nombre seize ou dix-sept, (quel nombre retiendrez vous) qu'il recite fort mal, y rapportant des portions du *sphenoide* & *ethmoide*, qui sont dans l'orbite, comme vous auez faict: le quinziésme peut estre dict le mur metoyen ou *septum* du nez, qu'il a dict ailleurs prouenir del'os *ethmoide*, & estre un cartilage. En apres il escrit estre situé sur le palais, duquel viét le *septum cartilaginofum* du nez, diuisant le nez en deux naseaux, lequel os a esté obmis, ce dict-il, de tous les *Anatomistes*. Grande contrariété & ignorance, ne sçachant pas distinguer le *septum* du nez, qui est portion de l'os *ethmoi-*

de d'auec le vomer : comme il appert plus manifestement par ces termes cy : (en la face il y a quatorze ou dix-sept os ; & le dernier est l'os Criste, ou le mur metoyen ou cartilage du nez prend son origine. Voila vn nombre incertain des os de la face, y comprenant la maxille inferieure pour deux, lequel est de quatorze, de seize, dix-sept. Il ne corte point qui est le seiziesme & dix-septiesme os.

Il erre grandement quand il décrit que l'os de la maxille superieure, qui fait portio du zygomma, est creux pour contenir vne substance morneuse pour la nourriture des dents molaires, & vn air implaté pour l'odorat. Ce n'est pas cet os qui est creux, mais le proche qui s'appelle maxillaire, il ne contient aucune substance mucceuse, non plus que l'os frontal, & l'air qui y est, estant eslongné du nez, n'ayant aucune communication avec les cautez de l'os frontal, ne peut estre l'air implanté de l'odorat.

Il compose le sternum de plusieurs os, iusques à huit, comme il dit auoir veu plusieurs fois : il deuoit dire aux petits enfans, car aux grands ce nombre ne se trouue point.

Il bastit l'eschine ou Rachis de trente-quatre vertebres, attribuant six à l'os sacrum, & quatre à l'os caudæ, en vn autre lieu il diét quand à l'os sacrum il est composé de quatre pieces, sans l'os appellé caudæ, grande contrarieté.

Il diét que la moüelle des os reçoit des nerfs en sa tunique qui la rendent sensible, ce qui est faux ; car elle n'a ny membrane ny nerfs.

Il n'a pas cogneu les canitez de l'oreille, bien qu'il les peust apprendre de Fallope qu'il cite souuent.

Mais il choppe lourdement, faisant vn desnombrement des os. Il propose le nombre de deux cens quarante-sept : qui est escrit tout au long, & non pas en chiffre, où on pourroit accuser la faute de l'Imprimeur, il en donne quatorze au crane, 14. ou 17. à la face (lequel nombre prendrez vous ?) ; à l'os hyoide, ou bien 11. lequel est-ce des deux, 24. à l'eschine, 2. clavicules, 24. costes, 3. au sternum, ou bien 7. (lequel est-ce des deux) 62. aux bras, 66. aux pieds. Tout cela bien cōpté & supputé ne monte qu'à deux cens vingt-deux os. Si vous y mettez 17. pour la face, 11. à l'os hyoide, 7. au sternum, vous n'y trouuerez que deux cens trente-sept, & s'il vous plaist y adiouster les trente-deux dents, vous aürez deux cens soixante-neuf, qui est par delà son compte. Le nombre de Paré de deux cens quarante-sept, a esté inseré aux leçons de monsieur Courtin fauslement, car tout bien supputé selon l'enumeration qu'il en fait, on n'en trouuera que 241.

Il semblera à vos compagnons, que vous estes vn grand Philosophe, quand vous discourez en vostre auant-propos, de l'erreur qui peut arriuer par l'organe, l'obiet, & le medium, mais ce discours descouure clairement vostre ignorance, & donne à cognoistre que vous n'entendez ce de quoy vous parlez. Car vous dictes, *qu'il arriue du deffaut au iugement, si le medium est alteré, soit le son,*

l'odeur, la faueur, ou le tact, &c. Qui vous a enſeigné que les obiects des ſens, ſoient le medium, pour faire l'action du ſens.

Or afin que vous ne penſiez ce que i'ay rapporté des Geants n'eſtre pas probable ny receuable, n'eſtant fondé que ſur l'opinion des Grammairiens Agellius & Macrobius, pour ſupplement i'adiouſte ce que i'auois oublié en ſon lieu, que des ſçauants Philoſophes Chreſtiens, qui uiuoient il y a plus de mil ou douze cens ans, ont reprouué ceſte grandeur exceſſiue des Geants. Philon le Iuiſ en ſon *Liure de Gigantibus*, Ioseph liure premier de l'Antiq. Iud. Sainct Cyrille liure neuſieſme *aduerſus Julianum*. Tous ces grands perſonnages diſent vnanimement que les Geants deſquels parle l'Eſcriture ſaincte, & qu'on dict auoir eſté au premier ſiecle, eſtoient des hommes barbares, arrogants, qui meſpriſoient la Diuinité, vrays enfans de la terre. De ſainct Dieu parlant par ſon Prophete Eſaye, il menace la Iudee de la fureur des Medes & Perſes. *Gigantes uenient, ut impleant furorem meum.*

Vous ayant remonſtré les fautes ſignalees & irreparables que vous auez faiçtes en l'Oſteologie ſur le modellé de Paré, maintenant i'examineray voſtre diſcours touchant les os du Geant: auquel ie trouue de la fauſſeté en la grandeur du corps, & aux oſſemens. Vous le deſcriuez de la longueur de vingt-cinq pieds & demy, i'ay meſuré l'os de la cuiſſe, celuy de la iambe avec l'aſtragal ioinct au calcaneum, qui ne montét qu'à ſix pieds, adiouſtez-y vn demy pied pour l'os pu-

bis, vous trouuerez que doublant ceste mesure vous n'aurez que treize pieds ou enuiron, car la moitié du corps est en la commissure de l'os pubis.

Ie ne puis croire que ledict Teutobochus eust esté si grand, dautant qu'il montoit à cheual, & estant mis en route n'ayant sceu trouuer ses cheuaux qu'il auoit d'ordinaire, quatre ou six pres de luy pour rechanger, il fut contrainct de s'enfuir à pied, ce qu'il n'enst sceu faire s'il eust esté si grand & massif comme vous le descriuez: car ces grands collosses de Geants ne peuuent si bien se remuer & manier que les autres hommes. Ce grand Geant Polypheme dans Virgile au troiziesme des Eneides, allant se pourmener au bord de la mer,

Trunca manum pinus regit & vestigia firmat.

Le grand Geant que veid Scaliger à Milan, estoit tousiours couché ne se pouuant remuer aisément.

Ce que ie trouue de manque en ces os, & qui me faict douter si ce sont les os d'un homme, c'est l'apophyse postérieure du calcaneum, qui est trop petite à proportion de l'os. Car en l'homme elle doit estre presque aussi grosse que tout l'os, pour soustenir le corps, & le tenir droit, dautant qu'elle est en partie cause de la rectitude de l'homme, comme rapporte Galien. Dauantage ledict astragale n'a point l'apophyse antérieure qui se doit inserer & ioindre dans la cavitè du scaphoide. L'os de la cuisse, comme vous-mesme l'aduonez, n'a point les deux tro-

chanterés qui sont extrêmement nécessaires pour attacher quantité de muscles qui seruent au mouuement de la cuisse, ny l'os en cet endroit est plus aspre & rabotteux qu'en vn autre. Par là ie collige que ledict Geant, (si ce sont les os d'un homme) ne pouuoit marcher, consequemment qu'ils ne peuuent estre les os du Roy Teutobochus belliqueux, qui auoit vne si puissante armee à conduire, où le mouuement dispos & allaigre du conducteur estoit extrêmement requis pour ordonner par tout.

Sinous examinons de pres tous les os de ce Geant homme supposé, nous trouuerons qu'il y a de la tromperie. Personne ne peut par le morceau de la mâchoire asseurer que ce soient les os d'un homme, mais bien d'un animal qui a la maxille aiguë & poinctué vers le menton : car la largeur de ce morceau estoit inegale, au contraire la largeur de la maxille inferieure de l'homme est par tout esgale, iusques aux angles de la base.

Vous descriuez les racines & les augets des dents, comme si les auiez tirez hors de leur lieu. Je ne sçay si ledict meneur d'ours vous a permis de casser & briser ces os, qui luy seruent de passeport & de lettre de change pour aller par toute la France. Vous deuiez adiouster cela pour vous donner plus de creance, les dents estoient semblables à des cailloux de fusil.

Vous accordez quand aux vertebres, que la plus grande ne se peut dire de quelle partie de l'eschine elle est, d'autant qu'elle n'a ny trous ny apophyses, par consequent elle est eteroclite,

Car il est bien aisé à vn bon Anatomiste, de cognoistre, quand mesme toutes les apophyses seroient perduës, considerant le corps de la vertebre, de quelle partie de l'eschine elle peut estre. Partant confessez que ceste vertebre n'est pas de corps humain, ains d'un animal.

Quand aux costes, vous n'en sçauriez rien asseurer par le morceau qui restoit, d'autant que les animaux ont les costes canelées & fissurées par le bas comme les hommes, & ont vne substance spongieuse & osseuse entre deux lames polies,

Encores moins pourriez-vous prouuer par le morceau de l'omoplate, que ce soit l'os d'un homme, car les bestes brutes ont la cavitè glenoïde & les sourcils, si vous eussiez trouué l'acromion & l'apophyse coracoïde, vous auriez raison d'asseurer que ce morceau superieur de l'omoplate est d'un homme.

En l'os du bras il ne se void que la teste, que vous appelez improprement epiphyse, ie croy que c'est à cause de la rupture, car aux os des grandes personnes de quarante ou cinquante ans il ne se remarque plus d'epiphyse. Ceste teste est diuisee par vne tres belle fissure, capable pour loger vn moyen gallemart, selon la veuë du sieur Habicot. Mais vous apprendrez s'il vous plaist, que la scissure est dans l'epiphyse, & qu'il n'y a point d'apophyses comme vous imaginez, partant rayez de vostre escrit les deux apophyses superieures du bras contenant la scissure.

L'os de la cuisse estant priué des deux trochan-

ters, ne peut estre d'un homme. Mais vous dites qu'ils ont esté rōpuës, comme estant l'endroit le plus foible de l'os femur. Je vous maintiens que lesdictes apophyses sont les plus dures parties de l'os, & presque petreuses. Vous adioustez que l'os femur en l'homme est plus grand qu'aux autres animaux. Apprenez que le singe aussi bien que l'homme, a l'os de la cuisse plus grand que tous les autres os de son corps: ce qui est de mesme en l'elephant. Ioinct que ledict os de la cuisse n'auoit point l'obliquité & longueur de son col, qui est necessaire pour faire l'articulation dicte enarthrose, qui donne le mouuement libre à la cuisse. Tellement que ceux qui n'ont ceste obliquité & longueur en vn os, ou deux os de la cuisse, sont boiteux d'un costé ou de tous les deux, ayans neantmoins les iambes, les genoux, les pieds esgaux, & aussi longs l'un que l'autre, comme remarque Galien, liure troiziesme de l'usage des parties.

L'os de la iambe auoit quelque deffaut en sa partie superieure, en ce que les deux cauitéz glenoides n'estoient bien marquees, qu'il ne se voyoit pas proprement le lieu de la rotule, comme vous-mesme confessez.

Je vous ay desia monstré la difference qu'il y auoit aux os du pied de ce Geant avec ceux de l'homme, c'est pourquoy ie n'en parleray point d'auantage.

Partant puis qu'il se trouue de la difference & deffectuosité aux os de ce Geant supposé: ils ne peuvent estre d'un homme. D'autant que

lez figures des os deuoient estre plus apparentes qu'en des petits os, selon vostre axiome que le plus & le moins ne change point l'espece, i'adiouste ny la figure. Par consequent en vn grand & gros homme, la figure de tous les os doit paroistre d'auantage qu'en vn petit corps. De là il s'ensuit que le col de l'os femur deuroit estre fort long à proportion de l'os: les trochanters deuroient paroistre fort gros, & faudroit que le Talon fust eminent & fort gros, pour soustenir ce grand colosse. Le porteur d'os nous a representé la teste en son tableau, qu'il n'a iamais veu, ou s'il l'a veu, il s'est bien gardé d'apporter la teste de cet animal, qui eust descouvert l'imposture. Ce maistre compagnon estant vn subtil barbier, a retranché aux os ce qui luy pouuoit nuire, & faict à croire qu'ils ont esté trouuez de ceste façon.

Ce qui me faict croire d'auantage qu'il y a de la tromperie en l'ostentation de ces os, & de la fausseté en vostre escrit, c'est que vous dictes qu'en douze heures ces os ayans senty l'air, se sont conuertis en poudre: & que le reste qui est demeuré estoit petrifié, à cause d'une eau viue qui couloit sur ces os. Si cela est ainsi cōme vous dictes, de quoy ne faict mention le petit liuret imprimé à Lyon, que le monstreur d'os distribuait luy-mesme. Je demande pourquoy le Perone qui est ioinct à la iambe ne paroist point: il pouuoit & meritoit d'estre petrifié aussi bien que la iambe: pourquoy plustost vne vertebre que toutes les autres? Pourquoy plustost la teste

du bras , & la teste de l'omoplate qui sont ioinctes ensemble , que la teste du femur qui se void , & non point l'ischion qui luy est ioinct. Si ces os que l'on monstre extraicts des trois parties du Schelet se sont petrifiez , il y a apparece que l'eau decouloit sur tout le cadauer , depuis la teste iusques aux pieds , toutesfois il ne s'en monstre que certaines parcelles. Or si les os estoient enfermez dans vn sepulchre de brique couuert de sable , ils ne pouuoient aysement se reduire en poudre. Veu que ce sont deux materiaux qui empeschent & resistent à la pourriture , comme vous-mesme l'aduouez. Si les os se sont conuer- tis en poudre ayans senty l'air , il est croyable qu'ils estoient desia reduicts en poudre , prests à s'esparpiller au moindre soufflé & atouchement : comment doncques auez vous peu , ou vn autre mesurer toutes les dimentions du corps & de toutes les parties , iusques à mesurer la rondeur de l'orbite de l'œil avec vos poulces. Je m'estonne comme ceux du pays ayans descouuert les os du Geant n'en ont point faict plus de bruit , qu'il ne se void point des attestations de ceux du pays qui ont visité le monument , comme on n'a point apporté des medailles au Roy , & beaucoup d'autres circonstances qui ont accoustumé d'estre obseruees en telles raretez.

Pour response à vostre digression , ie vous aduerty que vous faillez lourdement , comparant la durezza des os du Geant avec les os des saints Martyrs , qui vous furent monstrez par les Prelats , Euesques , Religieux & Religieuses ,
pour

pour les discerner. Car les os des saints ont esté conseruez miraculeusement, autrement ils ne differeroient des autres, & n'y auroit point de merueille en la beauté & integrité de ces ossemens. Ioinct que si les os exposez à l'air sont demeurez entiers sans estre endommagez, selon vostre dire, ceux du Geant enfermez dans la brique & le sable deuroient estre sains & entiers, n'ayans senty l'air comme les autres.

Puis donc que par l'examen de ces os, on peut iuger manifestement qu'ils ne sont point d'un homme, vous me permettrez de dire que ce n'est point absurdité en l'organe de la veüe, ny à l'esprit, de dire qu'ils sont sortis d'un elephant. Encores que moy ny vous n'ayons iamais veu telles bestes, encores moins l'osteologie, mais ie le vous prouueray par les authoritez des anciens qui l'ont veu & contemplé, comme Aristote, *Ælianus*, & de nostre temps *Petrus Gillius*. L'Elephant, comme ils r'apportent, a aux iambes de derriere des cheuilles, & les iambes posterieures sont plus longues que les anterieures, il a les iambes presque egaleement grosses en haut & en bas, il fleschit les iarrets des pieds de derriere comme faict l'homme, tout au contraire des autres animaux. Il a un *calcaneum*, & ayant des cheuilles, il s'ensuit qu'il aura un *astragal* semblable ou approchant à celuy de l'homme. Les vns disent qu'il a le pied rond comme un grand bassin continu exterieurement, mais interieurement diuisé selon les ossemens en cinq doigts. Aristote escrit que le pied de l'Elephant

est fendu, ce qui est confirmé par Petrus Gillius
 tesmein oculaire : qui dict le pied estre fendu en
 cinq doigts. Il a huict dents molaires en chaque
 maschoire, & les deux dents qui sortent de la
 bouche comme aux sangliers, sont celles dont
 nous auons l'yuoire, que quelques-vns ont creu
 faussement estre des cornes. Par ceste conferen-
 ce des os de l'Elephant avec ceux du Geant sup-
 pose, l'on descouurira aisement la tromperie &
 l'abus des os, que l'on a creu estre d'un homme
 Geant, & pour donner couleur de verité qu'ils
 estoient du Roy Teutobochus. Mais cc que ie
 trouue estrange est, que M. Nicolas Habicot,
 qui se presume estre bon Anatomiste, tasche de
 nous persuader par son escrit, que ce sont des
 vrais os humains, non contrefaits & falsifiez,
 en quoy se recognoist le dire de Pline estre veri-
 table : *nullum tam impudens mendacium est, vt teste
 careat.*

Voila les principales fautes que i'ay remarqué
 en vostre liuret, lesquelles, ie supplie messieurs
 les Medecins & vos confreres Chirurgiens, con-
 siderer, afin que les Medecins cognoissent par l'i-
 gnorance du plus sçauant d'entre les Chirur-
 giens, quelle suffisance & doctrine peut auoir
 le reste en l'Anatomie. Pareillement les Chirur-
 giens verront & aduoueront qu'il y a des Mede-
 cins plus sçauans qu'eux au faict de l'Anatomie,
 puis qu'un escholier en Medecine faict la leçon
 au plus entendu & suffisant d'entre eux; lequel,
 s'il est sage & prudent par ceste admonition, il
 abaissera son orgueil & presumption, & ne des-

daignera de venir apprendre avec les escoliers en Medecine l'Anatomie, que les Docteurs montrent publiquement : *Nulla est etas nimis fera ad discendum*. Tant que l'homme vit il apprend.

Vous dites que la teste se prend en deux façons par les Anatomistes parfaitement, ou imparfaitement. Prenez garde que vous n'ayez la teste de vostre esprit Anatomic imparfaite, partant ne soyez plus si outrecuide de promettre l'accord des Medecins avec les Chirurgiens. Nous n'auons rien à demesler avec vous autres au fait de l'Anatomie, vous n'y entendez rien du tout, & n'y a pas vn Chirurgien qui ait escrit de soy mesme & de son esprit vne Anatomie.

Comment pouuez vous accorder les Anatomistes ensemble? vous qui n'entendez le Latin, & n'avez la cognoissance des auteurs Anatomistes. Vous n'avez en François que les œuvres Anatomiques de Galien, la petite Anatomie de Vesale qu'il a fait estant fort ieune, le gros volume est bien d'un autre moule; On vous a donné en François l'Anatomie de Syluius avec les commentaires sur le liure de Galien des os: l'Anatomie de Vassée qui est toute prise de Galien: l'Anatomie de Charles Estienne qui est fort maigre. Vous avez de vostre costé Pare qui a escrit de l'Anatomie assisté des Medecins de Paris qui luy ont composé son liure: Guillemeau luy a succédé. Depuis peu on vous a tourné en François l'Anatomie de Monsieur du Laurens. Vous avez aussi les Leçons de Monsieur Courtin, excellent Medecin de Paris, remplies de fausses allegations & reedit.

tes, bien qu'elles soient sorties d'un grand esprit, elles ont esté deprauees & gastees estant tombees entre vos mains, laquelle edition des œuvres de monsieur Courtin, rabaissera fort vostre caquet: car vous pensiez vous enrichir des plumes d'autrui, & en bastir vostre Theorique Anatomie, que vous promettez tant de fois.

*Quid dignum tanto feret hic promissor hiatus,
Parturient montes, nascetur ridiculus mus.*

Or tous ces Anatomistes que ie viens de citer, ne font pas la quatriesme partie des auteurs qui ont admirablement escrit en l'Anatomie, cōme Fallope, Columbus, Vesale, Bartholomeus Eustachius, Volcherus Coiter, Arantius, Plateus, Picolominus, Varolius, Fabricius ab Aquapendente, Casserius, Iasolinus, Bauhinus, lesquels tous ont escrit ou des Anatomies entieres, ou bien des obseruations & remarques sur toute l'Anatomie.

Vous me direz que vous auez ouy parler de Fallope, de Columbus, de Vesale dans les liures de monsieur Courtin, mais quelquefois le passage est mal r'apporté, non par la faute de monsieur Courtin, mais par l'ignorance de celuy qui les a receus ou transcrits. Ce qui a trompé celuy d'entre vous qui s'est ingeré de censurer le liure de Guillemeau, lequel controlleur commet plus de fautes absurdes, qu'il ne s'en trouuera dans le liure de Guillemeau; attribuant aux auteurs des opinions auxquelles ils n'ont iamais pensé ny songé, & blasmant les bonnes opinions qui sont veritables & tirees de Galien.

Puis donc que vous ne pouuez lire ny entendre les bons Anatomistes, comment osez-vous promettre vne Theorique Anatomie par controuerse, qui appaisera toutes les difficultez qui se trouuent en l'Anatomie. Pauvre hōme si vous estes si mal fondé en l'Osteologie, qui est le fondement de toute l'Anatomie, *non pas un habit du subiect de la Medecine & Chirurgie*, cōme vous parlez improprement: y ail apparence que vous sçachiez tous les mysteres & secrets de ceste diuine sciēce. Les Prelats & Euesques qui vous appellent pour discerner les os des Reliques ont esté biē abusez, ie m'asseure que pour les os innommez du tarse au pied, vous leur auez monstré & nōmé vn os de la main, & pour vne vertebre du col celle du dos. Croyez M. Habicot, que vous auez faict vn grand tort, premierement à vostre renommee, puis à vostre compagnie, publiant par escrit vōstre ignorance en l'Anatomic. Car les Medecins & les escholiers n'auront plus de creance, & ne feront plus d'estat des ieunes Chirurgiens frais esmoulus depuis cinq ou six ans. Puis que vous qui sçauiez l'Anatomie depuis vingt ans, qui l'auiez monstree publiquement aux escholes de Medecine, qui auez tant de fois assisté aux chefs d'œuvres, ne l'auiez mieux appris. Si vn escholier se presentant à l'examen pour estre receu Bachelier auoit faict la moindre faute que vous auez cōmise, il seroit rebutté, & vous osez, avec quelques autres de vōstre factiō, vous vanter que vous sçauiez plus que les Medecins en l'Anatomie, que vous estes les Maistres &

Professeurs, que vous l'avez monstree depuis trente ans à tous les Medecins qui sont aujour-d'huy. Mais vous recognoistrez que depuis cinq ans les escholiers en Medecine n'ont rien appris de vous autres, graces à Dieu, & à nos maistres: & maintenant il n'y a pas vn bon escholier estudiant vn an en l'Anatomie, qui n'en sçache davantage que le plus sçauant & habile d'entre vous. Confessez donc ingenuëment, ou par force, que les Medecins sont vos maistres, que vous ne iouyssez de l'Anatomie & Chirurgie que par leur moyen. Ce sont les Medecins qui vous ont composé les liures de l'Anatomie & Chirurgie, qui vous ont mis en François les liures Grecs & Latins des anciens Medecins, vous en deuez auoir obligation à Dalechamp Medecin, qui vous a donné en François tous les liures de Galien concernant l'Anatomie, ceux d'Hippocrate en Chirurgie, & la Chirurgie de Paul Æginete. Si monsieur Gourtin pouuoit reuenir au monde, voyant vostre ingratitude, il se plaindroit & vous reprocheroit avec le Pasteur de Virgile,

Heu quid, valui misero mihi, floribus austrum

Perditus, & liquidis immisi fontibus apros.

Tous les Anatomistes en François que ie vous ay cité n'ont-ils pas esté Medecins? La Chirurgie de Paré, qui est vostre grand maistre, n'a elle pas esté bastie & façonnée par les Medecins de Paris? Pourquoy donc ingrats, niez-vous auoir receu des Medecins la science que vous possédez? qu'estiez-vous auant que les Medecins de

Paris vous eussent enseigné? Il a bien fallu que les Medecins qui vous ont communiqué tant de secrets & merueilles en l'Anatomie & Chirurgie ayent trauaillé, mis la main à l'œuvre, cōme ont fait tous les Anatomistes François & Latins, que ie vous aycy-deuant nommé. Ce qui est practiqué auourd'huy aux celebres Vniuersitez par des grands personnages Medecins, à Padoue par Fabricius ab Aquapendente, à Bologne par Iulius Rota, à Naples par Iasolinus, à Basle par Bauhinus, à Leyden par Petrus Pauuius, tous anciens & sçauans Medecins, comme tesmoignent leurs escrits.

Vous trouuez estrange qu'à Paris les Medecins decouppent & monstrent au doigt l'Anatomie, au grand profit & contentement des escholiers. Rondelet à l'aage de soixante ans Professeur de Montpellier, ayant esté dispensé de lire, se mit à enseigner & decoupper l'Anatomie publiquement, comme luy-mesme le certifie en sa Preface de son liure des Poissons: ce qui est confirmé par Ioubert son disciple en la vie dudit Rondelet. Je voudrois que vous peussiez entendre la Preface de Vesale sur sa grande Anatomie, ou bien de grace faictes vous la interpreter. Vous verrez comme ce bon Medecin, Chirurgien & Anatomiste reprend & deteste la mauuaise façon qui estoit introduicte de son temps aux escholes de Medecine, où vn Medecin discourroit del'Anatomie sans sçauoir dequoy il parloit, vn Barbier qui decouppoit à sa mode à tort & à trauers, qui controlloit tout ce qu'auoit dict le

Docteur, le ramenant à l'inspection, le contrainant & conjurant iusques là, de mettre luy mesme la main à l'œuvre s'il en doutoit; lequel Docteur honteux & confus par son ignorance, estoit contrainct d'acquiescer, se rapportant au dissecteur.

C'est vn deshonneur aux Medécins quand les Escholiers sortans de leur eschole, r'emportent d'un Chirurgien les decisions qui se trouuent sur les difficultez de l'Anatomie & Chirurgie.

Ceux qui trouuent deshoneste qu'un Medecin dissecque & montre luy-mesme l'Anatomie, craignent qu'on ne les vueille astringre & obliger à faire le mesme, n'ayant pas le courage ny la hardiesse, comme Auerrhois & Auenzoar de toucher vn corps mort. Mais les actions sont volontaires & personnelles, il ne fera cela qui vouldra, pourueu qu'il n'empesche les autres de travailler pour le public.

Comment peut sçauoir le Medecin parfaictement l'Anatomie, s'il n'a mis luy-mesme la main à l'œuvre, faudra-il qu'il depende du Chirurgien, qui luy fera accroire ce qu'il vouldra, ne sçachant rien dauantage que le Chirurgien ou dissecteur luy aura montré. Car s'il pense alleguer quelque chose de nouveau, extraict des bōs Anatomistes incognus à nos Chirurgiens, il sera rebutté & condamné avec ses auteurs, & s'il persiste dauantage, on le priera de rechercher luy-mesme sur le subiect ce qu'il allegue.

Non, non, il n'est point plus deshoneste au Medecin, de manier l'Anatomie, que de regarder

der les excremens du corps humain. C'estoit iadis l'exercice des Roys d'Ægypte, anciennement les plus celebres Medecins s'adonnoient à ceste practiqué: c'estoit lors que l'Anatomie fleurissoit en Alexandrie, & par toutes les escholes de la Grece estoit administree par les nobles & excellentes mains des Medecins. Tellement que ie puis dire del'Anatomie, qui estoit practiquee par les Medecins, ce que rapporte Pline de l'agriculture qui estoit fertile au temps passé, maintenant sterile & ingrate. *Quenam ergo tanta vbertatis causa erat, ipsorum tunc manibus Imperatorum colebantur agri, ut fas est credere, gaudente terra vomere laureato & triumphali aratore, siue illi eadem cura semina tractabant qua bella, eademque diligentia arua disponebant qua castra, siue honestis manibus omnia latius proueniunt, quoniam & curiosius fiunt. At nunc eadem illa vincti pedes, damnata manus, inscripti vultus exercent: non tamen surda tellure quæ parens appellatur; colique dicitur & ipsa honore his assumpto, ut non inuita ea & indignè ferente credatur id fieri. Et nos miramur ergastulorum non eadem emolumenta esse, quæ fuerint Imperatorum, capite 3. libr. 18.*

I'ay remarqué souuentefois aux Anatomies publiques, quand le Medecin discourt chacun deuiser & s'entretenir au lieu d'escouter. Mais quand le Chirurgien vient à son tour à parler & demonstrier bien que mal, chacun otüre les oreilles pour entendre, dispose sa veüe pour voir, & tout l'honneur del'Anatomie, bien souuent

mal administree, demeure audict Chirurgien.

Il n'y a Vniuersité au monde où l'exercice de l'Anatomie soit plus frequent qu'à Paris, ceste celebre eschole est recommandee par tout, principalement pour ceste partie de Medecine, comme estoit du temps de Galien l'eschole d'Alexandrie, où il enuoye les escholiers de Medecine pour apprendre l'Anatomie.

Les Estrangers viennent de toutes parts à Paris pour voir la demonstration du corps humain, & apprendre quelque chose de nouveau, comme auourd'huy il y en a vne vingtaine d'estrangers, Allemands, Anglois, Danois, Italiens; tous desia aduancez en Medecine; ils sçauent les discours que peut faire vn Medecin, estans tirez des Anatomistes qu'ils ont desia leu, s'ils n'ont quelqu'un qui leur demonstre en Latin les parties du corps humain, comme l'on faict en toutes les Vniuersitez de Medecine, ils s'en vont mal edifiez, ce que ne peut faire vn Chirurgien.

Pourquoy donc demandez-vous à venir enseigner & monstrier l'Anatomie en nos escholes? Ce n'est que de la peine pour vous autres, on vous en veut descharger & dispenser. Mais ie recognois maintenant que c'est pour conseruer le credit & l'honneur que vous receuiez en faisant leçon publique aux escholiers de Medecine, pour auoir tousiours l'aduantage par dessus les Medecins, qui ne touchoiēt & ne voyoiēt rien en l'Anatomie que par vos mains & vos yeux. Vo⁹ ap-

prehendez que la parfaicte cognoissance de l'Anatomie, & le maniement de cet ouvrage, nous ouvre l'esprit & donne entree en la Chirurgie, que vous croyez posseder tous seuls, & à vous seuls appartenir, sans en communiquer ny consulter les Medecins.

Il feroit beau voir maintenant aux escholes de Medecine vn Chirurgien discourir & monstrier l'Anatomie & operations de Chirurgie avec sa longue robe & bonnet quarré, ou bien en la maison tenir eschole publique, enseigner les seruiteurs de l'estat, contrefaire le Medecin, ordonner des receptes sur les malades, se qualifier Professeur de Chirurgie en l'Vniuersité de Paris. Pensez vous que cet habit augmente vostre science, & vous rende meilleurs Chirurgiens? sçachez que cet habit est indecent à vostre Profession. Hippocrate recommande au Chirurgien que ses vestemens soient courts, serrez, sans plis, avecques des manches estroictes. De saint Suidas remarque qu'en tous les pourtraicts d'Hippocrate, il a tousiours sa robe retroussée sur ses espaules. Soranus dict que c'estoit pour auoir les mains plus libres à trauailler. Tertulian au liure de Pallio nous enseigne que les Prestres d'Esculape, c'est à dire les Medecins, estoient ainsi habillez, le manteau fort court, estoit agraffé sous la gorge, & les deux costez renuersez sur les espaules. Iapix le Chirurgien dans Virgile au douzième de l'Enéide estoit ainsi vestu,

*Pæonium in morem, senior succinctus amictu,
Multa manu medica, Phœbique potentibus herbis.*

Mais baste pour l'habit, pourueu que chacun face son deuoir: car l'habit, comme l'on dict, ne faict pas le Moyne. Vous demeurerez tousiours Chirurgiens: *simia semper erit simia*: & les vrays Medecins seront tousiouts recognus pour tels qu'ils sont. Mais prenez garde que si vous secoüiez l'obeyssance, que les Medecins ne deuiennent Chirurgiens, & qu'ils n'instruisent les escholiers pour estre leurs Chirurgiens: ils vous ont faicts ce que vous estes, & vous ont donné la science que vous auez, ils nous la peuuent aussi conferer, & faire que la Chirurgie & Medecine soit exercee par vn seul. Les anciens Medecins ne s'abaisseront pas iusques là, mais ils supporteront les escholiers en Medecine, & s'en seruiron pour Chirurgiens & Medecins cliniques.

Qui empeschera que nous n'operiõs aussi bien que vous? N'auons-nous pas la main aussi asseuerce & habile que vous? ceux qui se passent maistres aux chefs-d'œuures ont ils faict toutes les operations sur vn corps viuant?

Si vous estes si bons Chirurgiens, que ne faiçtes vous toutes les operations de Chirurgie? pourquoy endurez-vous des tailleurs de pierre, des renoueurs, des oculistes, des chastreurs, des arracheurs de dents, dont la ville de Paris est pleine, & la maison du Roy, couchez sur l'estat;

car vous les admettez en vostre corps, comme membres de la Chirurgie, faisans des operations que vous ne sçauriez faire, autrement vous de-
uriez les exclure, & n'en receuoir pas vn.

Pour conclusion, M. Habicot, respectez d'o-
resnauant les Medecins de Paris mieux que vous
n'avez pas fait, reconnoissez qu'ils sont vos
maistres, non pas à vous seul, mais à tous ceux de
vostre estat, ceste submission vous ouurira l'es-
prit pour discerner vos fautes, & pour estre cy
apres plus discret à mettre quelque chose à la
veuë & à la face des Medecins de Paris. Car reco-
gnossant vostre imbecilité, vous emprunterez
le conseil & le secours d'un sçauant Medecin
qui vous sera amy, comme ont fait tous ceux
de vostre robbe, lequel corrigera vostre orto-
graphe, changera les mots barbares, les impro-
prietez du langage François ou Latin escorché,
& osterà les fautes que vous commettiez en la
chose.

Souuenez-vous du dire d'Apelles, que vous
recitez en vostre Gigantostologie, i'adiouste
que Megabifus, vn grand seigneur de Perse fre-
quentant la boutique d'Apelles, estoit estimé
fort sçauant en la peinture, mais quand il voulut
discourir des couleurs, Apelles ne le peut souf-
frir. Voyez ces petits garçons qui broient l'o-
chre, cependant que vous n'avez dict mot, ils
vous ont admiré à cause de vostre qualité, main-
tenant que vous parlez si hardiment des choses
que vous n'entendez, ils se moquent de vous.

Ne desdaignez point, & vos confreres aussi, de venir & assister aux Anatomies publiques qui se font aux escholes de Medecine, vous y serez receus gratis, & aurez seance honeste, vous apprendrez de messieurs nos maistres, plusieurs beaux secrets en l'Anatomie que vous ne sçavez pas : vous entendrez de belles interpretations sur les difficultez qui se trouuent aux liures Anatomiques de Galien que vous ne sçauriez comprendre de vous-mesmes. Vous remarquerez les erreurs ou bien errates, pour parler selon vostre langage, que vous avez commises en vostre Pratique Anatomique, que ie vous monstrey quand il vous plaira, vous verrez les fautes lourdes que vous avez faictes en l'Osteologie, lesquelles ne vous ont point esté iniustement reprochees.

Pourtant vous ne vous tiendrez point offensé, si ie vous ay redressé au bon chemin & releué quand vous avez choppé. Iesçay que la verité engendre hayne, mais si vous l'aymez, comme vous l'avez protesté en l'epistre de vostre Gigantologie, pardonnez à mon naturel qui n'est point adulateur & menteur.

*Quid Roma faciam? mentiri nescio, librum
Si malus est nequeo laudare, & poscere.*

F I N.

Fautes suruenuës en l'Impression.

Pag. 4. en la marge, adioustez part. 9. p. 12. lin. 26. tout
proche. p. 17. lin. 6. effacez le premier a. p. 29. lisez que
la scissure est dans la teste, qui est aux hommes aagez a-
pophyse, aux ieunes epiphyse, Et qu'il n'y a point d'au-
tres apophyses, pour faire la scissure. p. 32. lin. 30. lisez
duree.